

## **Amandmani na Prijedlog zakona o sportu u BiH**

**Poslanik Denis Bećirović**

PREDMET: Amandmani na Prijedlog zakona o sportu u Bosni i Hercegovini

U skladu sa članom 109. stav 1. Poslovnika Predstavničkog doma Parlamentarne skupštine Bosne i Hercegovine podnosim:

### AMANDMANE

na Prijedlog zakona o sportu u Bosni i Hercegovini.

#### AMANDMAN 1.

U članu 2., nakon stava d), dodaje se novi stav pod e.), koji glasi:

„e) sportsko obrazovanje“

#### AMANDMAN 2.

U članu 9., nakon stava e), dodaje se stav f), koji glasi:

„ciljevi i zadaće razvoja sporta, aktivnosti potrebne za provedbu tih ciljeva i zadaća, te određuju nosioci razvoja i mjere kontrole njegove realizacije“.

#### AMANDMAN 3.

U članu 10., u stavu 1. riječi : „pribavljene saglasnosti“ zamjenjuju se riječima „pribavljena mišljenja“, a ostali dio ovog stava ostaje isti.

U istom članu ., nakon stava 1., dodaje se stav 2., koji glasi:

„Vijeće ministara Bosne i Hercegovine donosi Godišnji program realizacije Strategije i Programa razvoja sporta u Bosni i Hercegovini u kojem se utvrđuju nosioci pripreme i realizacije, rokovi i izvori finansiranja“.

#### AMANDMAN 4.

U članu 20. stav 3. briše se.

#### AMANDMAN 5.

U članu 37., nakon stava 2. pod c)., dodaje se novi stav pod e), koji glasi:

„Sportista kome drugi takmičar pri takmičenju nanese tjelesnu povredu ima pravo na naknadu štete, ako mu je povreda nanesena namjernim ili grubim kršenjem sportskih pravila“.

#### AMANDMAN 6.

U članu 45., u stavu 2. iza riječi : „U sportskim takmičenjima može učestvovati samo osoba za koju je“ dodaju se riječi „ u periodu od šest mjeseci prije sportskog takmičenja“, a ostali dio ovog stava ostaje isti.

#### AMANDMAN 7.

U članu 49., u stavu 1. riječi „na nivou Bosne i Hercegovine“ brišu se, a umjesto njih dodaju se riječi „u Bosni i Hercegovini“.

U istom članu, stav 2. se u cjelosti briše. Umjesto pomenutog stava dodaje se novi stav 2., koji glasi:

„Organizator je dužan da osigura nesmetano i bezbjedno održavanje sportskih priredbi i sportskih takmičenja. Organizator je dužan preduzme mjere koje omogućavaju predupređenje rizika nastanka štete za učesnike, gledaoce i treća lica (upozorenja, isticanje zabrana, davanja obavještenja i upustava i sl.).

Nakon stava 2., dodaju se novi stavovi 3., 4., 5. i 6., koji glase:

„Organizator sportskih priredbi i sportskih takmičenja je dužan da, imajući u vidu njen značaj, očekivani broj gledalaca i druge okolnosti, utvrdi da li postoji izražen rizik da za vrijeme njihovog održavanja dođe do nasilja ili nedoličnog ponašanja gledalaca.

„Organizator sportske priredbi i sportskih takmičenja, ukoliko postoji opasnost iz stava 3. ovog člana, dužan je da preduzme potrebne bezbjednosne mjere, u skladu sa zakonom.“.

„Sportske organizacije, sportisti i drugi učesnici sportskog takmičenja dužni su da saraduju sa organizatorom, i ne smiju svojim postupcima izazivati ili doprinostiti nasilju ili nedoličnom ponašanju gledalaca“.

„Sportske organizacije su obavezne da podstiču organizovanje i dobro ponašanje klubova navijača“.

## AMANDMAN 8.

U članu 64., nakon stava 1., dodaje se novi član 2., koji glasi:

„Javne potrebe u sportu na državnom nivou su:

- a) podsticanje i afirmisanje sporta, posebno sporta djece, mladih, studenata i osoba sa invaliditetom,
- b) podsticanje planiranja i izgradnje sportskih objekata
- c) briga o vrhunskim sportistima,

- d) djelovanje sportskih saveza i Olimpijskog komiteta Bosne i Hercegovine,
- e) djelovanje informatičkog sistema u sportu,
- f) naučni i razvojni programi u sportu,
- g) međunarodna sportska saradnja i međunarodne obaveze Bosne i Hercegovine,
- h) dodjeljivanje državne nagrade za sport „Mirza Delibašić“.

#### AMANDMAN 9.

Nakon člana 66., dodaje se novi dio 7., a predloženi dio 7. postaje dio 8. Novi dio 7. glasi:

„DIO SEDMI – DRŽAVNA NAGRADA U SPORTU

#### Član 67.

(Državna nagrada za sport „Mirza Delibašić“)

Državna nagrada za sport „Mirza Delibašić“ (u daljnjem tekstu: državna nagrada) najviše je priznanje koje Bosna i Hercegovina dodjeljuje za posebne rezultate i doprinos od posebnog značaja za razvoj sporta u Bosni i Hercegovini.

Državna nagrada dodjeljuje se stručnim i javnim djelatnicima u području sporta, sportistima, pravnim i fizičkim osobama koje obavljaju sportsku djelatnost te drugim pravnim i fizičkim osobama zaslužnim za razvoj sporta.

Državna nagrada dodjeljuje se u obliku medalje s likom Mirze Delibašića, posebne diplome i novčane nagrade.

#### Član 68.

Državna nagrada za sport dodjeljuje se za višegodišnje uspješno djelovanje u sportu, osvajanje olimpijske medalje, posebno naučno, stručno i pedagoško ostvarenje ili sportsko dostignuće.

Odluku o nagradi donosi Komisija državne nagrade sporta „Mirza Delibašić“ (u daljnjem tekstu: Komisija državne nagrade).

Predsjednika i pet članova Komisije državne nagrade imenuje Parlamentarna skupština Bosne i Hercegovine iz reda uglednih sportskih i javnih radnika, istaknutih sportista i drugih istaknutih stručnjaka iz područja sporta na vrijeme od četiri godine, na prijedlog Vijeća ministara Bosne i Hercegovine.

Državna nagrada se dodjeljuje kao godišnja nagrada i nagrada za životno djelo. Svaka od tih nagrada može se dodijeliti samo jednom.

Vijeće ministara Bosne i Hercegovine donosi pravilnik kojim bliže uređuje kriterije za dodjelu državne nagrade, način rada Komisije državne nagrade i druga pitanja značajna za dodjelu državne nagrade.

#### Član 69.

Dodjela državne nagrade za sport „Mirza Delibašić“ od državnog je interesa a sredstva za dodjelu nagrade osiguravaju se u Budžetu Bosne i Hercegovine.

Visinu novčanog dijela godišnje nagrade i nagrade za životno djelo „Mirza Delibašić“ odlukom će odrediti Vijeće ministara Bosne i Hercegovine“.

#### AMANDMAN 10.

U članu 68., u stavu 1. predloženog teksta Zakona o sportu u Bosni i Hercegovini od strane Vijeća ministara Bosne i Hercegovine, nakon stava g), dodaje se novi stav pod h), koji glasi:

„ako organizira sportsko takmičenje i sportsku priredbu u Bosni i Hercegovini a ne ispunjava uvjete iz člana 50. ovog Zakona“.

#### OBRAZLOŽENJE:

Prvi amandman ima za cilj da zakonski precizira sport u Bosni i Hercegovini, tako što se dodaje i sportsko obrazovanje koje treba da omogući obučavanje u fizičkom vježbanju, razvoj fizičkih sposobnosti i sticanje sportskih navika.

Drugi amandman odnosi se na preciziranje zadataka koji trebaju biti sadržani u Strategiji razvoja sporta u Bosni i Hercegovini.

Treći amandman obrazlaže način pripreme i realizacije Strategije i programa razvoja sporta u Bosni i Hercegovini.

Četvrti amandman odnosi se na član 20. kojim se definira organizaciona struktura sportskog saveza, koja polazi od klubova, koji se shodno izraženom interesu i slobodnoj volji udružuju u strukovne saveze BiH, entitetske ili u zavisnosti od razvijenosti sporta i druge organizacione cjeline. Kako je praksa u sportskim sistemima širom Evrope, da je klub osnovna organizaciona jedinica koja mora imati pravo slobodnog udruživanja u sve više nivoe, pomenuti stav u cjelosti odudara od takvih principa, te je samim tim nepotreban.

Petim amandmanom se želi garantovati jedno od važnih prava sportista, koje je zagarantovano u većini razvijenih evropskih zemalja.

Šesti amandman precizira period utvrđivanja opće zdravstvene sposobnosti osobe koja želi učestvovati u sportskim takmičenjima.

Sedmim amandmanom želi se jasno utvrditi koje su obaveze i uvjeti koje organizator mora ispuniti prije održavanja sportske priredbe. Imajući u vidu česte incidente na sportskim priredbama u Bosni i Hercegovini nužno je zakonski utvrditi obaveze organizatora takmičenja, po uzoru na razvijene zemlje Evrope.

Osmi amandman predviđa definisanje javnih potreba Bosne i Hercegovine u oblasti sporta.

Devetim amandmanom se predviđa ustanovljenje državne nagrade za sport „Mirza Delibašić“, koja bi se dodjeljivala za izuzetna sportska dostignuća i doprinos od posebnog značaja za razvoj sporta u Bosni i Hercegovini. Nagrada bi nosila ime po najvećem sportisti Bosne i Hercegovine u XX stoljeću, košarkašu Mirzi Delibašiću. Zakonsko uvođenje državne nagrade za sport predstavljala svojevrсно priznanje, ali i dodatnu motivaciju za sve one koji u budućnosti budu uspješno djelovali u sportu, osvajali olimpijske medalje i ostvarivali naučna, stručna i pedagoška dostignuća u oblasti sporta. Vijeće ministara Bosne i Hercegovine će nakon usvajanja Zakona o sportu u Bosni i Hercegovini donijeti poseban pravilnik kojim će precizirati uvjete za dodjelu nagrade, način rada Komisije državne nagrade i druga pitanja značajna za dodjelu nagrade.

Desetim amandmanom predviđa se sankcionisanje organizatora sportskih takmičenja i sportskih priredbi u Bosni i Hercegovini, koji ne organizuju sportska takmičenja u skladu sa Evropskom konvencijom o suzbijanju nasilja i nedoličnog ponašanja gledalaca na sportskim priredbama, posebno na nogometnim utakmicama.